



聖門志卷之一

鹽邑志林第五十七帙

黃國樊維城彙編

海鹽

呂元善纂輯

姚士麟

胡震亨訂閱

男呂兆祥參考

從祀列傳

叙曰昔孔子稱蘧伯玉為夫子決非及門之士  
公伯寮愬子路得罪聖門去之是矣左丘明親  
受業於孔門為春秋內外傳而不在弟子之列  
竟居從祀之首則不可解者今惟遵依

國朝嘉靖九年所定位次自左丘明至王守仁十七人從祀東廡公羊高至胡居仁十六人從祀西廡顏無繇王周輔成八人從祀啟聖祠林放至范甯七人改祀於鄉公伯察至吳澂十五人罷祀懸直至曹端三十五人擬祀孔廟趙岐孫奭錢唐三人擬祀孟廟俱附之末簡以備參考云

先儒  
周末二秦一漢六隋一  
宋共一元一本朝四

東廡  
左丘明 穀梁赤 高唐生 毛萇  
杜子春 王通 歐陽修 司敦頤

程頤 陸九淵 張載 楊時 朱熹 陳獻章

王守仁

西廡  
公羊高 伏勝 孔安國 董仲舒  
后蒼 韓愈 胡安國 程顥

邵雍 司馬光 胡安國 呂祖謙  
張栻 真德秀 薛瑄 胡居仁

啟聖祠

東配  
顏無繇 孔鯉 程向 蔡元定

西配  
曾點 孟激 朱松 周輔成

改祀  
林放 遠瑗 鄭玄 鄭衆  
盧放 服虔 范甯 荀况

罷祀  
公伯察 秦冉 顏何 荀况  
戴聖 劉向 楊雄 賈逵

馬融 何休 王肅 王弼  
杜預 王安石 吳澂 王弼

擬祀  
懸直 顏何 鄭玄 孔穎達  
范仲淹 魏了翁 李侗 羅從彥

何基	王柏	金履祥	黃榦
輔廣	蘇軾	孫復	文天祥
岳飛	游酢	呂大臨	謝良佐
胡宏	劉因	許謙	蔡清
陳真晟	羅倫	章懋	黃仲昭
吳與弼	鄒守益	王艮	羅欽順
羅洪先	呂楠	曹端	

孟廟

擬配 韓愈

擬祀 趙岐 孫奭 錢唐

先儒左子 春秋

左丘明山東兗州府汶上縣人 或曰鳳陽府人 楚左史倚

相之後春秋者魯史記之名也周室既衰載籍殘

缺仲尼思存前聖之業以魯周公之國禮文備物

史官有法故與丘明觀其史記而修之皆口授弟

子弟子退而異說丘明恐失其真乃為之傳丘明

授魯申申授吳起起授子期期授鐸椒椒授虞卿

虞卿作抄撮九卷授荀卿荀卿授漢張蒼及賈誼

誼為左氏傳訓故授趙人貫公為河間獻王博士

貫公授子長卿長卿授張禹張禹授尹更始更始

聖門志 卷之二  
授子咸及翟方進胡常常授賈護而劉歆從尹咸及翟方進受繇是言左氏者本之賈護劉歆歆自左氏春秋可立哀帝納之以問於諸儒皆不對歆遂移書責讓太常博士左氏始得立於學宮唐太宗貞觀二十一年從祀宋真宗祥符元年追封瑕丘伯徽宗政和元年改封中都伯

國朝嘉靖九年改稱先儒丘子

左丘明廟在陝西平涼府靈臺縣東北二十里

左丘明墓有一在山東濟南府肥城縣西南二十

五里一在兗州府澤縣東北七十里

### 先儒公羊子

周末

公羊高山東青州府臨淄縣人受春秋於卜子夏

高傳其子平平傳其子地地傳其子敢敢傳其子

壽壽與弟子齊人胡母子都趙人董仲舒著以竹

帛子都授東海嬴公嬴公授同郡孟卿孟卿授魯

人眭孟眭孟授東海嚴彭祖魯人顏安樂故後漢

公羊有嚴氏顏氏之學仲舒以公羊顯於朝授李

育育授羊弼弼授何休休作解詁其學遂大行唐

太宗貞觀二十一年從祀宋真宗咸平三年加封

臨淄伯

國朝嘉靖九年改稱先儒公羊子

先儒穀梁子

周末

穀梁赤山東兗州府人孔子以春秋之說口授子夏子夏授穀梁穀梁作傳以授孫卿孫卿授魯申公申公授瑕丘江公江公傳子至孫爲博士後周武帝時江公與董仲舒並仲舒本治公羊於是詔太子受公羊春秋江公之傳其後寢微惟魯榮廣皓星公二人學焉蔡千秋從廣受又事皓星公宣帝卽位閭衛太子好穀梁春秋以問丞相韋賢長信少府夏侯勝及侍中樂陵侯史高皆魯人言穀梁氏本魯學公羊氏乃齊學也由是穀梁之學大

聖門志 卷之二  
五  
盛於是有尹胡申章房氏之學唐太宗貞觀二十一年從祀宋真宗咸平三年追封襲丘伯徽宗政和元年以封爵犯宣聖諱改封睢陽侯國朝嘉靖九年改稱先儒穀梁子

先儒伏子

秦

伏勝字子賤山東濟南府鄒平縣人縣東北一十八里有伏生鄉能言書秦始皇焚書時伏生爲博士獨壁藏之其後兵起流亡漢定天下求其書亡數十篇獨得二十九篇卽以教於齊魯之間文帝時求能治尚書者聞伏生欲召之時年九十餘老不能行於是詔太常使掌故晁錯往受之伏生老不能正言因言不可曉使其女傳言教錯齊人語與穎川異錯所不知者凡十一二畧以其意屬讀而已今文尚書是也伏生作尚書傳四十一篇授

聖門志 卷之二  
同郡張生張生授千乘歐陽生歐陽生授同郡倪  
寬寬授歐陽生之子世世傳至曾孫高謂之歐陽  
學又有夏侯都尉受業於張生以授族子始昌始  
昌傳族子勝為大夏侯之學勝傳從子建別為小  
夏侯之學故書有歐陽大小夏侯三家並立迄漢  
東京相傳不絕而歐陽最盛唐太宗貞觀二十一  
年從祀宋真宗大中祥符三年追封乘氏伯  
國朝嘉靖九年改稱先儒伏子

伏生祠

在鄒平縣伏生鄉

伏生書院

在鄒平東北一十八里元時主簿楊溫建

伏生墓在鄒平縣東北一十里

### 先儒高堂子

漢

高堂生山東兗州府人齊公族也齊卿高敬仲食  
采於高堂因氏焉傳儀禮漢興高堂生為博士傳  
士禮十七篇至武帝時又有禮古經出於魯淹中  
而河間獻王好古愛學收集餘燼得而獻之合五  
十六篇竝威儀之事高堂生授瑕丘蕭奮奮授東  
海孟卿卿授后蒼孝宣世后蒼最明戴德戴聖慶  
普皆其弟子三家立於學官故儒林傳云漢興傳  
禮者十三家惟高堂生五傳得戴德戴聖而禮大  
明唐太宗貞觀二十一年從祀宋真宗咸平三年



追封萊蕪伯

國朝嘉靖九年改稱先儒高堂子

先儒孔子

漢

孔安國字子國先聖十一世孫也父忠爲博士封褒成侯安國少學詩於申公受尚書於伏生年四十爲諫議大夫遷侍中博士漢武帝天漢中魯共王欲壞孔子舊宅以廣其居聞金石絲竹之聲乃止於其壁中得所藏古文虞夏商周之書及傳論語孝經皆科斗文字悉以書還孔氏安國乃考論古今文字撰衆師之義凡五十九篇爲四十六卷悉上送官承詔作傳引序各冠其篇首定五十八篇以授都尉朝而司馬遷亦從安國問故遷書多

古文說都尉朝授膠東庸生謂之尚書古文之學  
後漢扶風杜林傳古文尚書同郡賈逵爲之作訓  
馬融作傳鄭玄亦爲之註然其所傳唯二十九篇  
又雜以今文非孔舊本晉世秘府所存有古文尚  
書經文今無有傳者至東晉豫章內史梅願始得  
安國之傳奏之時又闕舜典一篇齊建武中吳姚  
興方於大桁市得其書奏上比馬鄭所註多二十  
八字於是始列於學官又集錄爲孔子家語四十  
四篇會巫蟲事起不果上由博士遷臨淮太守在  
官六年以病免年六十卒於家其子孔邛傳家學  
尤善詩禮孫孔衍成帝時爲博士唐太宗貞觀二  
十一年從祀宋真宗咸平三年追封曲阜伯  
國朝嘉靖九年改稱先儒孔子

崇聖書院在南直鳳陽府盱眙縣治東第一山舊  
傳西漢孔安國父子相繼爲臨淮太守後人因  
建書院以祀之上有先聖燕居殿遺址

先儒毛子

漢

毛萇北直河間府人善說詩漢初有魯齊韓三家並立萇自謂子夏所傳初子夏作詩序以授魯申申授李克克授孟仲子仲子授根牟子根牟子授荀卿荀卿授魯人毛亨爲詩訓詁河間獻王得詩傳而獻之朝時毛萇受亨詩爲獻王博士每說詩獻王悅之取詩傳加毛字以別齊魯韓三詩也故世謂亨爲大毛公萇爲小毛公萇所著有毛詩故訓二十卷詩傳十卷平帝時立於學官萇授同國貫長卿長卿授解延年延年授徐敖敖授九江陳

聖門志 卷之二  
俠俠授同郡謝曼卿東海衛敬仲受學於曼卿先  
儒相承謂之毛詩序子夏所創毛公及敬仲又加  
潤益鄭衆賈逵馬融並作毛詩傳鄭玄作毛詩箋  
至今獨立唐太宗貞觀二十一年從祀宋真宗咸  
平三年追封樂壽伯

國朝嘉靖九年改稱先儒毛子

毛公書院在北直河間府河間縣尊福鄉元順宗  
至正中總管王思誠奏建設山長

毛公墓在河間縣尊福鄉

先儒董子

漢

董仲舒北直河間府景州人州西南六十里廣川  
鎮其故里也少治春秋漢景帝時爲博士下帷講  
誦弟子傳以久次相授業或莫見其面蓋三年不  
窺園圃其精如此進退容止非禮不行學士皆尊  
仰之武帝卽位舉賢良文學之士前後百數而仲  
舒以賢良對策爲江都王相復相膠西兩相驕王  
皆以禮匡正凡所著述皆推明孔氏抑黜百家立  
學校之官州郡舉茂才孝廉皆自仲舒發之年老  
以壽終於家家徙陝西西安府興平縣子及孫皆

聖門志 卷之二  
以學顯仲舒所著皆明經術之意及上疏條教凡百二十三篇而說春秋事得失聞舉王杯蕃露清明竹林之屬復數十篇十餘萬言皆傳於世元文宗至順元年從祀

國朝洪武二十九年追封江都伯成化三年改封廣川伯嘉靖九年改稱先儒董子

董子書院在景州西南廣川鎮元順宗至正中總管王恩誠奏建設山長

董仲舒墓在西安府城南六里下馬陵

### 先儒杜子

漢

杜子春河南河南府偃師縣人縣西南二十五里有緱氏廢縣其故里也通周官蓋周官是周公所制官政之法秦始皇深惡之禁絕不傳漢時有李氏得周官上於河間獻王獨闕冬官一篇購以千金不得遂取考工記補成六篇奏之至成帝時黃門郎劉歆表而出之周禮始得列序著於錄畧王莽時置博士以行於世子春受業劉歆家於南山因以教授鄉里明帝永平初年已九十猶能誦識時鄭衆賈逵往受其業二子爲發明其說著周禮

聖門志 卷之二  
解後馬融作周官傳以授鄭玄玄作周官註皆祖  
子春焉唐太宗貞觀二十一年從祀宋真宗咸平  
三年追封緱氏伯

國朝嘉靖九年改稱先儒杜子

先儒后子

漢

后蒼字近君山東兗州府郟城縣人從孟卿受禮  
最明其業在曲臺校書因說禮數萬言號曰后氏  
曲臺記蒼授沛人聞人通漢慶普梁人戴德及德  
從兄子聖西漢世后氏二戴禮並立於學官劉向  
考校經籍合二百十四篇戴德刪其煩重爲八十  
五篇謂之大戴記戴聖又刪大戴之書爲四十六  
篇謂之小戴記漢末馬融傳小戴之學又足月令  
一篇明堂位一篇樂記一篇合四十九篇而鄭玄  
受業於融又爲之註故今小戴記與周官六篇古

經十七篇並傳蒼啟之也蒼又事夏侯始昌始昌通五經蒼亦兼通齊詩著齊詩故訓二十卷詩傳三十九卷授翼奉蕭望之匡衡由是齊詩有翼匡之學蒼前漢宣帝朝爲博士官至少府國朝嘉靖九年考古求禮以蒼爲禮之宗詔令從祀稱先儒后子

先儒王通

隋

王通字仲淹山西平陽府河津縣人漢徵君霸之後也世以儒顯父隆隋文帝開皇初爲國子博士仲淹自幼篤學慨然有濟蒼生之志嘗受書於東海李育學詩於會稽夏璵問禮於河東關子明正樂於北平霍汲考易於族父仲華不解衣者六年乃續詩書正禮樂修元經讚易道九年而六經大就隋文帝仁壽三年西遊長安見帝帝坐太極殿召見因奏太平十二策帝大悅下其議於公卿公卿不悅時將有蕭牆之釁仲淹知謀之不用也作

東征之歌而歸累徵不起僕射楊素甚重之勸之  
仕仲淹曰通有先人之敝廬足以庇風雨薄田足  
以具餐粥讀書談道足以自樂願明公正身以治  
天下使時和年豐通也受賜多矣不願仕也煬帝  
大業末卒於家謚曰文中子生子二福郊福時所  
著有禮論十卷樂論十卷續書二十五卷續詩十  
卷元經十五卷贊易十卷正觀初其弟凝子福時  
又收其議論分爲六部號曰王氏六經  
國朝嘉靖九年從祀稱先儒王子

先儒韓子 唐

韓愈字退之河南懷慶府修武縣人後魏安定桓  
王茂七世孫也父仲卿爲武昌令有美政終秘書  
郎退之生三歲而孤隨伯兄會貶官嶺表會卒嫂  
鄭氏鞠育之年七歲讀書日記數千言比長盡通  
六經百家之學舉進士第歷遷四門博士監察御  
史唐德宗時極論官事怒貶陽山令有愛及民民  
生子多以其姓字之歷改職方員外郎疏論刺史  
陰黨華陰令復左遷博士乃作進學解以自諭執  
政覽之奇其才改比部郎中史館修撰轉考功知



制誥進中書舍人改太子右庶子歷遷刑部侍郎  
時憲宗遣使者往鳳翔迎佛骨入禁中三日乃送  
佛祠王公士人奔走膜頌至為夷法灼體膚委珍  
貝騰沓係路退之上表極諫帝大怒持示宰相將  
抵以死裴度崔羣為言愈雖狂發於忠悃宜寬容  
以開言路乃貶潮州刺史至潮問民疾苦皆曰惡  
溪有鱷魚食民畜產且盡民是以窮乃為文祝之  
是夕暴風震電起溪中數日水盡涸西徙六十里  
自是潮無鱷魚之患改袁州刺史袁人以男女為  
隸過期不贖則沒入之退之至悉計傭得贖所沒  
歸之父母七百餘人召拜國子祭酒遷兵部侍郎  
轉吏部侍郎穆宗長慶四年卒年五十七贈禮部  
尚書謚曰文有原道原性師說等篇皆與衍宏深  
與孟子相表裏以佐佑六經宋神宗元豐七年從  
祀追封昌黎伯

國朝嘉靖九年改稱先儒韓子

韓文公廟 有二

一在廣東潮州府治東韓山宋時建文公為刺  
史時登覽此山植木其上邦人因呼為韓木  
凡科第之多寡則以其花之繁稀卜焉有無

亦如之

一在廣東廣州府陽山縣

韓昌黎祠在江西玄州府學右宋時祖無擇建因  
昌黎曾為刺史故立祠以祀焉

尊韓書院在廣州府連州陽山縣東相傳韓愈曾  
讀書於此後人因立書院

韓山書院在潮州府治西南隅元時郡守王翰建  
因韓愈刺史潮州立焉

韓文公墓在懷慶府孟縣北皇甫湜為誌

先儒歐陽子

宋

歐陽修字永叔江西吉安府廬陵縣人父觀宋真  
宗咸平三年進士及第為秦州判官永叔四歲而  
孤母鄭氏守節自誓親誨之學家貧至以荻畫地  
學書幼敏悟過人讀書過目成誦長游隨州得韓  
愈遺藁於廢書籠中讀而心慕焉苦志探賸至忘  
寢食舉進士試南宮第擢甲科補西京推官始從  
尹洙游為古文議論當世事迭相師友與梅堯臣  
游為歌詩相倡和遂以文章名冠天下入朝為館  
閣校勘仁宗慶曆三年知諫院乃為朋黨論帝獨

獎其敢言而賜五品服顧侍臣曰如歐陽修者何處得來時仁宗更用大臣杜衍富弼韓琦范仲淹皆在位增諫官員用天下名士永叔首在選中論事切直韓琦范仲淹相繼罷去修上疏極諫出知滁州徙揚州潁州復學士留守南京遷翰林學士俾修唐書奉使契丹嘉祐二年知貢舉加龍圖閣學士知開封府唐書成拜禮部侍郎兼翰林侍讀學士五年拜樞密副使六年參知政事盡心匡弼與韓琦策立英宗與曾公亮考天下兵數及三路屯戍多少地理遠近更爲圖籍凡邊防久缺屯戍

者必加蒐補神宗熙寧四年以太子少師致仕自號六一居士五年卒於汝州年六十有六贈太子太師謚文忠生子發棐嘗謂漢之文涉晉魏而弊至唐韓愈振起之唐之文涉五季而弊至宋歐陽修又振起之挽百川之頽波息千古之邪說羽翼大道扶持人心此兩人之力也

國朝嘉靖九年從祀稱先儒歐陽子

西湖書院在南直鳳陽府潁州西湖之濱歐陽修守穎樂其風土晚年終老於此遂築書院

國朝洪武間淪於河

歐陽修墓在河南開封府新鄭縣西二十里蘇轍  
爲神道碑

先儒胡子

宋

胡瑗字翼之南直揚州府泰州如臯縣人門人稱  
爲安定先生其先世本長安復居陵州祖司寇叅  
軍修已卒葬如臯廬墓因家焉父訥爲寧海節度  
在任生翼之故爲海陵人也翼之甫七歲善屬文  
年十三通五經以聖賢自期待鄰父見而異之與  
其父言曰後當爲國家偉器貧甚無以自給往泰  
山與孫明復石守道三人同讀書十年不歸省得  
家書見面上平安二字悅而置之弗視恐有所牽  
也范仲淹薦於朝以布衣對崇政殿除湖州教授

倡明道學一新故習創名齋署曰經義者所以經  
乎仁義禮樂彞倫之義明其體也曰治事者所以  
治乎水利兵農筭數之事適其用也科條備具以  
身先之宋仁宗皇祐五年十月召至京師爲國子  
監直講遂居太學遷大理寺寺丞嘉祐元年擢太  
子中允充天章閣侍講國子監請留主太學事上  
從之賜緋衣銀魚袋士出其門者凡數千禮部歲  
所得士翼之弟子十常居四五自河汾以後能立  
師道成就人才者必以翼之爲首稱焉年六十有  
七卒於杭州謚文昭葬於烏程之何山莆陽蔡君  
謨爲墓誌廬陵歐陽永叔爲墓表河南程正叔爲  
傳生子三人長志康舉進士志寧知永州志正篤  
學孝友

國朝嘉靖九年從祀稱先儒胡子

安定書院

有二

一在浙江湖州府治西北宋理宗淳祐中建

國朝宣德間重修

一在泰州城西安定爲師有道後人仰之因立

書院以祀

胡瑗墓

有二

一在浙江湖州府城南一十里  
一在如臯縣安定鄉正統初增築

先儒周子 宋

周敦頤字茂叔湖廣永州府道州人世居營道濂溪之上宋真宗天禧元年丁巳茂叔生於州之營樂里幼孤依舅氏龍圖學士鄭珣以茂叔有遠器愛之如子仁宗景祐三年奏補試將作監主簿康定初授洪州分寧縣主簿縣有獄久不決者茂叔至一訊立辨慶曆四年除南安軍司理叅軍移郴縣桂陽令皆有治績至和元年遷大理寺丞知洪州南昌縣南昌人喜曰是能辨分寧獄者吾屬得所訴矣嘉祐中改太子中舍僉署合州判官事轉

殿中丞六年轉國子博士通判虔州八年四月英宗登極遷虞部員外郎五月作愛蓮說是歲移永州在永三 嘗作拙賦英宗治平四年攝邵州事新學校以教其人神宗熙寧初呂公著薦為廣南東路轉運判官三年轉虞部郎中提點本路刑獄茂叔不憚出入之勞瘴毒之侵雖荒崖絕島亦必緩視徐按務以洗冤澤物為己任意以此得疾懇請郡符知南 小軍因家廬山蓮花峰下前有溪合於湓江取營 迨所居濂溪以名之築室其上名曰濂溪書堂示不忘父母之邦之意學者宗之遂號

一在湖廣永州府道州學內宋時建胡 為記

孝宗淳熙中重建張栻為記

一在湖廣寶慶府學宋時建朱熹

宗濂書院在南昌府南宋時江萬里以 廬嘗

典是邦有善政葺宇祀之扁曰宗濂 介舍元時

移於東湖改名書院

太極書院在順天府城內元時中書行省楊惟中

建中祀周敦頤以程顥程頤張載楊時游酢朱

熹配享又刻太極圖通書西銘 祠壁

道源書院在江西南安府學東宋 宗淳祐間建



應為 又記

中祀周敦頤配以程顥程頤

東山書院在湖廣寶慶府城東 本朝嘉靖中建  
中祀周敦頤以張九成配享

濂泉書院在廣東廣州府城內宋時建以祀濂溪  
周敦頤 本朝正統中重建學士楊溥爲記

元公書院在廣東潮州府學西元公周敦頤嘗漕  
運廣東其孫梅叟爲郡時建

湘江書院在廣東韶州府城北帽子峰南麓宋理  
宗淳祐間楊大異建

三洲書院在廣東肇慶府德慶州東七十里三洲

爲濂溪先生嘗著太極圖明天理之根源究萬物  
之始終又著通書四十篇發明太極之蘊爲南安  
司理時通判程珦使二子顥頤往受業焉茂叔每  
令尋孔顏樂處說者謂其得孔孟之本源大有功  
於學者熙寧六年癸丑卒年五十有七葬江州德  
化縣清泉社蓮花峰栗樹嶺生子二壽燾皆太廟  
齋郎燾官至寶文閣侍制宋寧宗嘉定十三年賜  
謚曰元理宗淳祐元年封汝南伯從祀元文宗至  
順二年加封追國公

國朝景泰六年以裔孫周冕爲翰林院五經博士



世襲嘉靖九年改稱先儒周子

周濂溪祠有四

一在江西南昌府寧州旌陽山麓周敦頤主分  
寧簿時創以延游學之士元燬於兵 本朝  
初卽其地建景賢書院至弘治間提學副使  
邵寶改名爲祠始肖像祀焉

一在江西九江府城南二十五里廬山麓周敦  
頤知南康時建舊名書院後守潘慈民增築  
宋熹爲記 本朝正統初江西巡按徐傑副  
使焦宏改祠肖像其中

一在湖廣永州府道州學內宋時建胡銓爲記

孝宗淳熙中重建張栻爲記

一在湖廣寶慶府學宋時建朱熹爲記

宗濂書院在南昌府南宋時江萬里以周敦頤嘗  
典是邦有善政葺宇祀之扁曰宗濂精舍元時  
移於東湖改名書院

太極書院在順天府城內元時中書行省楊惟中  
建中祀周敦頤以程顥程頤張載楊時游酢朱  
熹配享又刻太極圖通書西銘于祠壁

道源書院在江西南安府學東宋孝宗淳祐間建

中祀周敦頤配以程顥程頤

東山書院在湖廣寶慶府城東

本朝嘉靖中建

中祀周敦頤以張九成配享

濂泉書院在廣東廣州府城內宋時建以祀濂溪

周敦頤 本朝正統中重建學士楊溥為記

元公書院在廣東潮州府學西元公周敦頤嘗漕

運廣東其孫梅叟為郡時建

湘江書院在廣東韶州府城北帽子峰南麓宋理

宗淳祐間楊大異建

三洲書院在廣東肇慶府德慶州東七十里三洲

巖畔

宋熙寧中周濂溪提刑嶺南所至洗冤澤民故皆立書院祀之

濂溪書院

同名濂溪者有七

一在肇慶府四會縣治北金鷄山之麓

一在肇慶府陽江縣學東

一在南直鎮江府丹徒縣治東南周濂溪少依

舅氏鄭响嘗居此後人因建書院舊在黃鶴

山下 本朝正統間移建於此

一在江西贛州府贛縣治東三里周濂溪嘗通

判虔州後人因建書院祀焉

一在湖廣永州府道州學西宋時建理宗賜額

一在湖廣武昌府學前舊爲射圃 本朝嘉靖  
四十三年改建書院

一在四川重慶府合州學傍周濂溪嘗判合州  
後人因立書院祀焉

周濂溪故宅在湖廣永州府道州西二十里濂溪  
之上元仁宗延祐間州人唐道舉重修歐陽玄  
爲記

周敦頤墓在江西九江府城南一十里清泉社

先儒程子

宋

程顥字伯淳河南河南府洛陽縣人十歲能爲詩  
賦二十六舉宋仁宗嘉祐二年進士及第調京兆  
府鄠縣主簿縣南山僧舍有石佛歲傳其首放光  
遠近男女聚觀晝夜雜處爲政者畏其神莫敢禁  
止伯淳始至詰其僧曰吾聞石佛歲現光有諸曰  
然戒曰俟復現必先白吾職事不能往當取其首  
就觀之自是不復有光矣調江寧府上元縣主簿  
有善政英宗治平四年移澤州晉城令專尚德化  
在邑三年百姓愛之去之日如失父母哭聲振野

神宗熙寧二年改著作郎尋以呂公著薦授太子中允權監察御史裏行神宗素知其名數召見前後進說甚多問所以爲御史對曰使臣拾遺補闕禪贊朝廷則可使臣掇拾羣下短長以沽直名則不能神宗歎贊以爲得御史體與執政王安石論新法不合去職後知扶溝縣凡居官坐處皆書視民如傷四字常曰顥常愧此四字哲宗立召爲宗正寺丞命至未及行而卒時元豐八年六月十五日也享年五十有四先生之死士大夫識與不識莫不哀傷焉葬伊川祖塋文彥博采衆論題其墓

曰明道先生伯淳自十五六時聞周茂叔論道遂厭科舉之業慨然有求道之志未知其要泛濫於諸家出入於老釋者幾十年返求諸六經而後得之明於庶物察於人倫知盡性至命必本於孝悌窮神知化由通於禮樂辯異端似是之非開百代未明之惑秦漢而下未有臻斯理也謂孟子沒而聖學不傳以興起斯文爲已任辯異端闢邪說使聖人之道燦然復明於世蓋自孟子之後一人而已宋寧宗嘉定十三年賜謚曰純理宗淳祐元年封河南伯從祀元文宗至順二年加封豫國公

國朝嘉靖九年改稱先儒程子

明道祠 有二

一在河南開封府扶溝縣學

一在山西澤州城內

書院在湖廣黃州府黃陂縣魯臺山麓宋天聖中

程珦為黃陂縣尉生顯願於官舍 本朝景泰

中蔡受建名二程書院黃州府城中有二程先

生祠

程明道墓在河南府城南

先儒程子 宋

程頤字正叔河南河南府洛陽縣人明道之弟幼

有高識非禮不動宋仁宗皇祐二年正叔年十八

上書闕下勸仁宗黜世俗之論以王道為心且乞

召對面陳所學不報游太學見胡瑗問諸生以顏

子所好何學為論題瑗得正叔文大驚異之即延

見處以學職呂希哲首以師禮事焉舉進士嘉祐

四年廷試報罷遂不復試英宗神宗朝大臣屢薦

皆不起元豐八年哲宗嗣位司馬光呂公著共疏

其行義曰伏見河南府處士程頤力學好古安貧

守節言必忠信動遵禮法年踰五十不求仕進真  
儒者之高蹈聖世之逸民望擢以不次使士類有  
所矜式詔以爲西京國子監教授力辭哲宗元祐  
元年應召至京師除秘書省校書郎正叔辭曰祖  
宗時布衣被召自有故事今臣未得入見未敢祇  
命於是召對擢崇正殿說書在經筵每進講日必  
宿齋豫戒潛思存誠冀以感動上意徽宗崇寧五  
年致仕時易傳成書已久學者莫得傳授其後寢  
疾始以授門人尹淳張繹大觀元年九月卒於家  
年七十五葬伊川祖塋世稱爲伊川先生正叔於

書無所不讀其學一本於誠以大學語孟中庸爲  
標指而達於六經動止語默一以聖人爲師張載  
稱其兄弟得孔孟不傳之學以爲諸儒倡平生誨  
人不倦故學者出其門最多淵源所漸皆爲名士  
如緱氏劉絢洛陽李籲尹焯上蔡謝良佐建州游  
酢河南壽安張繹武功蘇昞藍田呂大臨呂大鈞  
將樂楊時尤著宋寧宗嘉定十三年賜謚曰正理  
宋淳祐元年封伊陽伯從祀元文宗至順二年加  
封洛國公

國朝景泰六年奉

聖旨程明道伊川有功儒教禮部行文書去查取  
他嫡長子孫各一人着有司起送來京欽此取到  
伊川十七世孫程克仁前來 欽授翰林院五經  
博士世襲嘉靖九年改稱先儒程子

北巖書院在四川重慶府涪州治北程頤註易于  
此黃廷堅匾曰鈞深堂宋寧宗嘉定中范仲武  
請爲書院塑像祀之

伊川書院在河南府嵩縣治北元仁宗延祐間建  
程伊川墓在河南府城南

先儒邵子

宋

邵雍字堯夫北直順天府涿州人本姬姓系出召  
公故世爲燕人曾祖令進以軍職逮事藝祖始家  
衡漳堯夫年三十從父古徙居河南河南府嵩縣  
鳴臯山葬其親於伊水上遂家焉少時自雄其才  
慷慨欲樹功名於書無所不讀始爲學卽堅苦刻  
厲寒不爐暑不扇夜不就席者數年已而歎曰昔  
人尚友於古而吾獨未及四方於是踰河汾涉淮  
漢周流齊魯宋鄭之墟北海李之才攝共城令聞  
堯夫好學嘗造其廬授以河圖洛書宓義八卦六

十四卦圖堯夫探賸索隱妙悟神契洞徹蘊奧汪洋浩博多所自得者初至洛蓬蓽環堵不庇風雨富弼司馬光呂公著諸賢退居洛中雅敬堯夫恒相從游爲市園宅名其居曰安樂窩因自號安樂先生出則乘小車一人挽之惟意所適士大夫家識其車音爭相迎候童孺厮隸皆懽然相謂曰吾家先生至也不復稱其姓字或留信宿乃去好事者別作屋如堯夫所居以候其至名曰行窩堯夫德器粹然望之知其賢有就問學則答之未嘗強以語人人無貴賤少長一接以誠故賢者悅其德

不賢者服其化忠厚之風聞於天下宋仁宗嘉祐間詔舉遺逸留守王拱辰以堯夫應詔授將作監主簿神宗熙寧初復求逸士中丞呂誨等復薦之補潁州團練推官皆固辭乃受命竟稱疾不之官程顥初侍其父識堯夫退而嘆曰堯夫內聖外王之學也又曰堯夫知慮絕人遇事能前知程頤曰其心虛明自能知之熙寧十年卒年六十有七生子伯溫克世其學所著書曰皇極經世觀物內外篇漁樵問對擊壤集贈秘書省著作郎哲宗元祐元年賜謚康節度宗咸淳三年從祀追封新安伯



聖門志 卷之二  
國朝嘉靖九年改稱先儒邵子萬曆四十五年河南巡按張至發比照程氏例以父邵古擬配啟聖二十六世孫邵南擬授博士奏

請

邵雍墓在河南南府嵩縣北

先儒張子

宋

張載字子厚陝西鳳翔府郿縣人其先宋人世居大梁父迪宋仁宗朝仕至殿中丞知涪州事卒諸孤皆幼不克歸僑寓於郿縣橫渠鎮之南大振谷口因家焉子厚少喜談兵至欲結客取洮西之地年二十一以書謁范仲淹一見知其遠器乃警之曰儒者自有名教可樂何事於兵因勸其讀中庸一夕與二程語道學之要渙然自信曰吾道自足何事旁求於是盡棄異學而學焉嘉祐二年登進士第爲祁州司法叅軍遷雲巖縣令政事以敦本

善俗爲先神宗熙寧二年御史中丞呂公著言其  
有古學神宗召見問治道對曰爲政不法三代者  
終苟道也帝悅以爲崇文院校書九年感異夢忽  
以書屬門人乃以所撰正蒙出示門人又作西銘  
又謂春秋之爲書在古無有乃聖人所自作惟孟  
子爲能知之非理明義精殆未可學游酢讀西銘  
渙然不逆於心曰此中庸之理也十年秦鳳帥呂  
大防薦之曰張載之學善發聖人之遺意其術畧  
可措之以復古乞召還舊職訪以治體乃詔知太  
常禮院與有司議禮不合復以疾歸行次臨潼疾  
甚沐浴更衣而寢旦而卒是年冬十二月也年五  
十有八貧無以斂門人共買棺奉其喪還葬於涪  
州墓南之兆翰林學士許將等言其恬於進取乞  
加贈卹詔賜館職世稱爲橫渠先生宋寧宗嘉定  
十三年賜謚曰明理宗淳祐元年追封郿伯從祀  
國朝嘉靖九年改稱先儒張子

南軒祠在湖廣長沙府湘鄉縣祀子厚張載南軒  
其號

橫渠書院在郿縣東五十里卽張載故居  
張橫渠墓在郿縣東南五十里

先儒司馬子

宋

司馬光字君實山西平陽府解州夏縣人父池幼孤家貲數十萬悉推諸父而自力讀書舉進士第知光山縣宋仁宗朝知鳳翔府召知諫院上表懇免仁宗曰人皆嗜進池獨嗜退官至天章閣待制知晉州生子三光其次子也君實甫七歲聞講左氏春秋愛之退爲家人講卽了其大旨自是手不釋書至不知饑渴寒暑仁宗寶元初中進士甲科除奉禮郎時池在杭州求簽蘇州判官事以便親許之丁內外艱執喪累年毀瘠如禮服除簽書武

成軍判官事改大理評事補國子直講樞密副使  
龐籍薦爲館閣校勘同知禮院累官端明殿學士  
知永興軍上疏極言青苗助役法不便出判西京  
留臺退居洛陽十五年哲宗初立召拜左僕射兼  
門下侍郎免朝覲許乘肩輿三日一入省光不敢  
當曰不見君不可以視事詔令子康扶入對且曰  
毋拜遂罷青苗復常平糶糶法兩宮虛已以聽遼  
夏使至必問光起居勅其邊吏曰中國相司馬矣  
毋輕生事開邊隙光自見言行計從欲以身殉社  
稷躬親庶務不舍晝夜賓客見其體羸舉諸葛亮

食少事煩以爲戒光曰死生命也爲之益力病革  
不復自覺諄諄如夢中語然皆朝廷天下事也故  
人謂元祐相業有旋乾轉坤之功年六十有八卒  
於西府太皇太后聞之慟與帝親臨其喪贈太師  
追封溫國公棣以一品禮服賻銀絹七千詔戶部  
侍郎趙瞻內侍省押班馮宗道護其喪歸葬陝之  
夏縣涑水南原之昇村謚曰文正賜碑曰忠清粹  
德蘇轍爲行狀及神道碑范鎮志其墓京師人罷  
市往弔鬻衣以致奠巷哭以過車及葬哭者如哭  
其私親嶺南封州父老亦相率具祭都中及四方

聖門志 卷之二  
皆畫像以祀飲食必祝嘗自言吾無過人者但平生所爲未嘗有不可對人言者耳誠心自然天下敬信陝洛間皆化其德於財利紛華如惡惡臭洛中有田三頃喪妻賣田以葬惡衣菲食以終其身其好學如饑之嗜食博學無所不通音樂律歷天文書數皆極其妙性不喜釋老曰其微言不能出吾書其誕吾不信也有文集八十卷資治通鑑三百二十四卷考異三十卷歷年圖七卷通曆八十八卷稽古錄二十卷本朝百官公卿表六卷翰林詞草三卷註古文孝經一卷易說三卷註繁辭二卷

註老子道德論二卷集註太元經八卷大學中庸義一卷集註楊子十三卷文中子傳一卷河外諮目三卷書儀八卷家範四卷續詩話一卷遊山行記十二卷醫問七篇其文如金玉穀帛藥石也必有適於用無益之文未嘗一語及之生子康舉明經累官至司諫直集賢院宋高宗建炎中配享哲宗廟庭度宗咸淳三年從祀孔廟  
國朝嘉靖九年改稱先儒司馬子

溫公書院在夏縣學之東元順宗至正間重修  
本朝天順二年重修

聖門志 卷之二  
涑水書院在河南汝寧府光山縣西司馬光父池  
爲光山令時生光於此後人因構書院以祀之  
因光號涑水故名焉 本朝正統九年重修  
司馬光墓在夏縣西北二十里鳴條岡

先儒楊子

宋

楊時字中立福建延平府將樂縣人幼穎異能屬  
文稍長潛心經史宋神宗熙寧九年登進士第時  
河南程顥與弟頤講孔孟絕學於熙豐之際河洛  
之士翕然從之中立調官不赴以師禮見顥於穎  
昌相得甚懽其歸也顥送之曰吾道南矣顥卒又  
見程頤於洛時蓋年四十矣一日見頤頤偶瞑坐  
時與游酢侍立不去頤既覺則門外雪深一尺矣  
杜門不仕者十年久之歷知瀏陽餘杭蕭山三縣  
皆有惠政張舜民在諫垣薦之得荊州教授德望

聖門志 卷之二  
日重四方之士不遠千里從之游號曰龜山先生  
徽宗重和元年召爲秘書郎遷著作郎欽宗靖康  
元年除右諫議大夫兼侍講僅三閱月遷國子祭  
酒高宗卽位除工部侍郎已而告老以龍圖閣直  
學士致仕優游林泉以著書講學爲事所著三經  
義辨推本孟子性善之說發明大學中庸之道有  
欲知方者爲指其攸趣無所隱也浮沉州縣四十  
有七年晚年居諫省九十日凡所論列皆切於世  
道而其大者則闢王氏排和議論三鎮不可棄云  
紹興五年卒年八十三葬將樂縣西山之原謚文

靖胡安國撰墓誌銘

國朝弘治九年追封將樂伯從祀嘉靖九年改稱  
先儒楊子

文靖書院在湖廣長沙府瀏陽縣南楊時曾宰是  
邑後人因建書院名以其謚

龜山書院

有三

一在浙江餘杭縣治南宋徽宗崇寧末楊時知  
縣事有遺愛於民民請立書院以祀之

一在南直常州府城東南六里楊時寓常州講  
道於此宋理宗紹定間郡守鄭必萬增創改

聖門志 卷之二  
舊書堂爲書院元時設山長主教事

一在將樂縣北龍池都封山麓卽龜山先生舊

宅宋度宗咸淳初建 本朝洪武七年重建

楊時墓在將樂縣西山

先儒胡子 宋

胡安國字康侯福建建寧府崇安縣人入太學以

程頤之友朱長文及穎川靳裁之爲師裁之與論

經史大義深竒重之二試於禮部宋哲宗紹聖四

年中進士第初廷試考官定其策第一宰執以無

詆元祐語遂以何昌言冠方天若次之又欲以宰

相章惇子次方天若時發策大要欲復熙寧元豐

之制安國推明大學以漸復三代爲對哲宗命再

讀之注聽稱善者數四親擢爲第三授太學博士

欽宗靖康元年除太常少卿起居舍人皆辭足不



躡權貴初王安石廢春秋不列於學官安國謂先  
聖手所筆削之書乃使人主不得聞講說學士不  
得相傳習亂倫滅理用夏變夷殆由乎此於是潛  
心刻意游泳沉酣者三十年及得伊川所作傳其  
間精義數條若合符節益以自信年六十一而書  
始就凡三十卷高宗謂深得聖人之旨進寶文閣  
直學士以紹興八年卒年六十五詔贈四官賜田  
十頃恤其孤謚曰文定蓋非常格也葬潭州湘潭  
縣龍穴山生子三寅寧宏皆以德學著稱寅禮部  
侍郎兼侍講寧太常丞宏右承務郎安國傳道伊  
洛志在春秋著書立言格君垂後所以明天理正  
人心扶三綱叙九法者深切著明體用該貫而其  
正色危言據經論事剛大正直之氣無愧古人謝  
良佐嘗稱其如大冬嚴雪百草萎死而松柏獨秀  
者也有文集十五卷資治通鑑舉要補遺一百卷  
國初以其春秋傳列於學官正統元年從祀成化  
三年追封建寧伯嘉靖九年改稱先儒胡子  
文定書院在崇安縣西元時縣尹彭廷堅建中祀  
胡安國以其子寅寧宏及從子憲配享 本朝

正統中重修

碧泉書院在湖廣長沙府湘潭縣西七十里胡安  
國南遊築室與其子宏張栻講道於此以其近  
碧泉因名

胡安國宅在崇安縣東從藉里

胡安國墓

有二

一在湖廣承天府當陽縣北一十五里其父淵

墓亦在縣北漳濱鄉

一在湖廣長沙府湘潭縣西南一百十里隱山

相傳安國累官至寶文閣學士致仕居衡山

卒葬於此

先儒朱子

宋

朱熹字元晦南直徽州府婺源縣人其先世故宅  
在縣治南永平鄉松巖里紫陽山下父松甫冠擢

進士第宋徽宗宣和間爲福建延平府尤溪縣尉

以高宗建炎四年庚戌九月十五日甲寅午時生

熹於尉之官舍幼穎悟莊重嘗從群兒戲沙上獨

端坐以指畫沙視之八卦也年十四松亡從父遺

言葬於建寧府崇安縣東南寂歷山遂家焉受業

於劉勉之勉之因松屬以後事遂誨之如子以女

妻之高宗紹興十七年丁卯熹年十八舉建州鄉

貢十八年戊辰登王佐榜進士第五甲第九十人  
二十年春如婺源展墓二十一年春銓試中等授  
左迪功郎泉州同安縣主簿建高士軒於簿廳西  
北隅又建經史閣於縣學後蓄古今之載籍選邑  
秀民克弟子員日與講說聖賢修己治人之道禁  
女婦之為僧尼者遷煥章閣侍制侍讀領鴻慶宮  
祠晚年徙建陽縣築室於三桂里扁曰竹林精舍  
孝宗乾道五年己丑九月母祝氏卒六年庚寅正  
月葬於建陽縣崇泰里後山天湖之陽名曰寒泉  
塢登第後五十年間歷事四朝仕於外者僅九考

立於朝者四十日道之難行也如此然紹道統立  
人極為萬世宗師則不以用舍為加損也謂聖賢  
道統之傳散在方冊聖經之旨不明則道統之傳  
始晦於是竭其精力以研窮聖賢之經訓於大學  
中庸則補其缺遺別其次序綱領條目燦然復明  
於論語孟子則深原當時問答之意使讀而味之  
者如親見聖賢而面命之於易於詩則求其本義  
攻其末失深得古人遺意於數千載之上於書則  
疑今文之難澀反不若古文之平易於春秋則疑  
聖心之正大決不類傳註之穿鑿於禮則病王安

石廢罷儀禮而傳記獨存於樂則憫後世律尺既  
亾而清濁無據若歷代史記繩以春秋紀事之法  
綱舉而不煩目張而不紊國家之理亂君臣之得  
失如指諸掌周程張邵之書所以繼孔孟道德之  
傳歷時未久微言大義鬱而不張俱爲之哀集發  
明而後得以盛行於世太極先天二圖精微廣博  
不可淫泆爲之解剝條劃而後天地本源聖賢蘊  
奧不至泯滅所著書有易本義起家著卦考誤詩  
集傳大學中庸章句或問論語孟子集註太極圖  
通書西銘解楚辭集註辨正韓文考異所編次有

論孟集義孟子指要中庸輯畧孝經刊誤小學書  
通鑑綱目宋名臣言行錄家禮近思錄河東程氏  
遺書伊洛淵源錄皆行於世寧宗慶元六年庚申  
三月甲子卒享年七十有一十一月壬申葬於建  
陽縣唐石里之大林谷先生沒朝廷以其大學中  
庸語孟訓說立於學官又有儀禮經傳通解未脫  
稿亦在學官平生爲文凡一百卷生徒問答凡八  
十卷別錄十卷黃幹曰道之正統待人而後傳自  
周以來任傳道之責者不過數人而能使斯道章  
章較著者一二人而止耳由孔子而後曾子子思

得其微至孟子而始著由孟子而後周程張子繼其絕至先生而始著識者以爲知言其門人最知名者如閩縣黃榦建昌李燔建陽蔡沉劉燾劉炳清江張洽龍溪陳淳光澤李方子都昌黃灝慶源輔廣宋寧宗嘉定中詔賜遺表恩澤謚日文尋贈中大夫特贈寶謨閣直學士理宗寶慶二年贈太師追封信國公紹定二年改封徽國公淳祐元年從祀元順宗至正二十二年改封齊國公國朝景泰六年奉聖旨朱文公有功世道嫡長子孫着做世襲翰林

院五經博士遂以建安縣九世孫朱挺應詔除授前職婺源縣守祠九世孫朱楸送國子監讀書景泰七年奉

聖旨顏子孟子程明道程伊川朱文公恁禮部行文着所在有司與他整理祠堂如原有的修理無的蓋造務要時常修飾不許損壞春秋猪羊致祭本年福建八世孫永樂甲午舉人徐州判官朱泗奏乞以文公門人黃榦蔡沉劉燾真德秀陪祀文公祠許之弘治十五年兵科給事中戴銑奏請行婺源縣修理朱子祠廟并致祭許之本年 欽降

婺源縣致祭朱子祠祝文嘉靖元年詔朱子守婺源縣祠十一世孫朱墅蔭錄翰林院博士以奉祭祀時守臣張芹等援孔氏曲阜衢州兩博士之例以請故也九年崇正孔廟祀典改稱先儒朱子

### 世系

朱文公生子三塾塾在皆以蔭補官朱塾贈中散大夫朱在宋理宗紹定中爲吏部侍郎文公平生所爲文皆其類次塾生子朱鑑官至湖廣總領隨叔在由建寧遷居建安之紫霞州鑑生子朱浚官至右文殿修撰兩浙轉運使元兵至福安州不屈

死之浚生子朱林元甘肅儒學提舉林生子朱炯炯延平府照磨炯甥生子朱暨暨生子朱鎔鎔生子朱泮泮武平縣主簿泮泮生子朱堂堂生子朱鑾鑾生子朱淞淞生子朱挺始授翰林院五經博士挺生子朱燉燉生子朱舉

朱文公祠

有二

- 一在福州建安縣紫霞洲上宋時郡守王埜建理宋賜名文公書院 本朝永樂中改建爲

### 祠

- 一在徽州府婺源縣

紫陽書院在徽州府治東宋淳祐間郡守韓補建  
理宗書額賜之元陳浩爲記 本朝成化十八  
年歙縣耆民汪貴奏請致祭許之

考亭書院在建寧府建陽縣西三桂里宋光宗紹  
熙三年壬子朱文公築室居此理宗詔立書院  
親書扁額賜之 本朝宣德中重修

同文書院在建陽縣崇化里朱文公建爲講學之  
所 本朝正統中重修

武夷書院在建寧府崇安縣南三十里武夷山朱  
文公初建精舍於此宋理宗景定中改建書院

設山長 本朝正統中重修

湛盧書院在建寧府松溪縣西元末建祀朱文公  
本朝景泰中重修

南溪書院在延平府尤溪縣治南宋高宗建炎四  
年朱熹生於此理宗嘉熙初縣令李修建祠以  
祀熹并祀其父松度宗咸淳初增置書院於其  
右分祠爲二 本朝永樂中重修

石井書院在泉州府晉江縣西南石井鎮舊名鰲  
頭精舍宋高宗紹興初失松嘗爲鎮於此有教  
及民後朱熹官同安至鎮訪父時事講訓益勤

寧宗嘉定中鎮官游絳立爲書院繪二先生之  
像而祀焉 本朝重修

龍江書院在漳州府城中登高山舊爲臨漳臺宋  
孝宗淳熙十六年朱文公守漳時將築室講學  
未果後守危積爲書院以成文公之志

鄒山書院在浙江寧波府城西五里元時邑人趙  
儒建以祀提舉浙東常平朱熹後設山長主之  
袁桶爲記

稽山書院在浙江紹興府城內卧龍山之陽宋理  
宗淳祐中馬天驥建朱文公祠其後吳革改祠  
爲書院元吳衍爲記

桐江書院在浙江台州府僊居縣西四十五里朱  
文公提舉浙東因行部至此書鼎山堂扁元仁  
宗皇慶中建書院以祀焉

石門書院在浙江處州府青田縣西七十里石門  
洞朱文公提舉浙東時循行至此元順宗至正  
中廉訪副使王侯始卽謝客堂故址建書院以  
祀焉

美化書院在浙江處州府縉雲縣東六十里因朱  
文公嘗講道於此宋理宗嘉熙中縣尉陳寔建



獨峰書院在縉雲縣東三十三里朱文公循行時  
至此愛其山水清絕宋寧宗嘉定中郡人葉嗣  
昌建

白鹿洞書院在江西南康府西北二十里廬山五  
老峰下唐李渤與兄涉俱隱此洞中嘗養白鹿  
以自娛因名白鹿洞南唐昇元中因洞建學後  
廢宋孝宗淳熙六年己亥十月朱文公知南康  
府軍詢得故址乃令星子令復建書院於其地  
且言於朝得賜勅額及賜御書石經監本九經  
又捐俸買書以益之并置田以贍學者朱熹自

爲詩賦呂祖謙爲記

臨汝書院在江西撫州府城西南二里宋馮去疾  
以朱文公嘗典是邦故立書院於湖上宋元皆  
有官領之

東山書院在江西饒州府餘干縣冠山左宋趙汝  
覲建因文公嘗講道於此故祀焉謝枋得爲記  
滄州精舍在建陽縣西文公晚年築扁曰竹林精  
舍後更名滄州元時卽此爲祠堂祀之虞集記  
寒泉精舍在建陽縣天湖之陽朱文公建爲讀書  
之所宋孝宗淳熙二年呂祖謙自東陽來訪留

寒泉精舍者旬日相與極周子程子張子書關  
大體而切日用者彙次成十四卷號近思錄  
晦庵在建陽縣西北七十里廬峰之顛宋孝宗淳  
熙二年七月朱文公建爲講道之所翠巒環繞  
內寬外密地氣高寒上多飛雲登者緣崖攀葛  
崎嶇數里始到其上文公愛其幽邃因號雲谷  
草堂名晦菴自爲記  
文公墓在建陽縣西北嘉禾里九峰山下大林  
谷其山九峰聯峙生時有異人語元晦曰龍居  
後塘其先生歸藏之所乎果葬於此

先儒呂子 宋

呂祖謙字伯恭浙江金華府金華縣人其先世山  
東萊州人徙壽春六世祖宰相夷簡徙開封祖好  
問隨宋高宗南渡仕至尚書右丞卜居金華自四  
世祖希哲從程頤游以儒行名於世故其家子孫  
有中原文獻之傳伯恭復師林之奇汪應辰胡憲  
而友朱熹張栻講索益精初蔭補入官後舉孝宗  
興隆元年進士復中博學宏詞科調南外宗學教  
授丁內艱居明招山四方之士爭趨之除太學博  
士改嚴州教授尋復召爲博士兼國史院編修官

實錄院檢討嘗讀陸九淵文喜之而未識其人考  
試禮部得一卷曰此必江西小陸之文也揭示果  
九淵人服其精鑑累官著作郎兼國史院編修以  
疾請歸淳熙八年卒年四十五葬金華府武義縣  
東明招山惠安寺之傍朱文公書石碑云宋東萊  
先生呂伯恭之墓伯恭學以關洛爲宗而旁稽載  
籍不見涯涘心平氣和不立崖異一時英偉卓犖  
之士皆歸心焉一日誦孔子言躬自厚而薄責於  
人忽覺平時忿懣渙然冰釋朱熹嘗言學如伯恭  
方是能變化氣質其所講畫將以開物成務既卧  
病而任重道遠之意不衰居家之政皆可爲後世  
法修讀詩記大事記皆未成書考定古周易書說  
闡範官箴辨志錄歐陽公本末皆行於世宋寧宗  
嘉泰八年賜謚成理宗嘉熙二年改謚忠亮景定  
二年追封開封伯從祀

國朝嘉靖九年改稱先儒呂子

呂成公祠在金華府城之鉄嶺呂祖謙講學之地  
宋理宗端平間門人卽其地立祠以謚取名焉  
麗澤書院在金華府城東北五里呂祖謙會友講  
道於此取易兌象以扁其居宋理宗嘉熙間賜

名麗澤書院元御史王龍澤爲記

東萊書院

有二

一在山東萊州府治西南呂祖謙以先世萊州人  
世號爲東萊先生故萊人立書院以祀之  
一在湖廣長沙府醴陵縣北四十里呂東萊嘗  
讀書於此

呂祖謙墓在金華府武義縣東一十五里

先儒陸子

宋

陸九淵字子靜江西撫州府金谿縣人生四歲問  
其父曰天地何所窮際父笑而不答遂深思至忘  
寢食他日讀書至宇宙解者曰上下四方曰宇往  
古來今日曰宙忽大省曰宇宙內事乃已分內事已  
分內事乃宇宙內事宋孝宗乾道八年登進士第  
在臨安士爭從之游言論感發聞而興起者甚衆  
淳熙元年調隆興府靖安縣主簿二年呂伯恭約  
子靜與季兄子壽會朱元晦諸君於信之鷺湖寺  
論及教人三年與王順伯論儒釋書曰儒者雖至

無聲無臭無方無體皆主於經世釋氏雖盡未來  
際普度之皆主於出世四年丁母憂六年服闋改  
建寧崇安縣九年除國子正教諸生無異在家十  
年除勅令所刪定官十三年除將作監丞爲給事  
中王信所駁詔主管台州崇道觀還鄉學者輻輳  
每開講席戶外屨滿耆老扶杖覲聽自號象山翁  
學者稱象山先生或勸子靜著書曰六經著我我  
著六經又曰學苟知道六經皆我著脚光宗卽位  
差知荆門軍民有訴者無早暮皆得造於庭卽爲  
酌情決之而多所勸釋其有涉人倫者使自毀其

狀以厚風俗惟不可訓者始寘之法每早禱卽雨  
郡人異之逾年政行令修民俗爲變諸司交薦丞  
相周必大嘗稱荆門之政以爲躬行之效一日語  
所親曰先教授九齡兄有志天下竟不得施以沒  
吾今將死矣又告僚屬曰某將告終會禱雪明日  
雪迺沐浴更衣端坐後二日卒葬於延福鄉朱陂  
之下會葬者以千數謚文安有詩文語錄傳於世  
國朝嘉靖九年從祀稱先儒陸子

陸象山祠在江西廣信府貴谿縣三峰山陸九淵  
嘗讀書於象山故門人立祠祀之 本朝重建

增祀其兄九韶九齡爲三先生祠

陸文安公祠在湖廣承天府荊門州城西陸九淵嘗知荊門州軍有惠政故後人立祠祀之

象山書院在貴谿縣西南七十里象山陸九淵講道之所

先儒張子

宋

張栻字敬夫四川成都府漢州綿竹縣人唐宰相九齡弟九臯之後也曾祖紘舉茂才異等知雷州有治聲祖咸舉進士賢良兩稱父浚登進士宋高宗時累官右僕射兼知樞密院事孝宗封魏國公謚忠獻敬夫穎悟夙成以古聖賢自期自幼所學莫非仁義忠孝之實長師五峰胡宏五峰一見卽以孔門論仁親切之旨告之敬夫退而思若有得焉五峰稱之曰聖門有人矣敬夫益自奮勵作希顏錄以應補承務郎紹興間忠獻出督奏敬夫充

機宜以軍事入見上異之除直秘閣五年除秘閣  
修撰荆湖北路轉運副使改知江陵府安撫本路  
敬夫自以不得其職求去詔以右文殿修撰提舉  
武夷山冲祐觀病且死猶手疏勸上親君子遠小  
人信任防一己之偏好惡公天下之理天下傳誦  
之孝宗淳熙七年卒年四十有八帝聞之嗟嘆不  
已朱元晦與黃榦書曰吾道孤矣敬夫爲人坦蕩  
明白表裏洞然詣理既精信道又篤其樂於聞  
而勇於徙義則又奮勵明決無毫髮滯吝意故其  
德日新業日廣所著論語孟子太極圖說洙泗言

仁諸葛武侯傳經世紀年行於世學者稱爲南軒  
先生宋寧宗嘉泰八年賜謚宣理宗景定二年從  
祀追封華陽伯

國朝嘉靖九年改稱先儒張子

城南書院在湖廣長沙府城南臨湘門外張栻講  
學之地

南軒書院 有二

一在江西袁州府東湖上中有張南軒祠有司  
歲時祀之

一在湖廣衡州府張南軒嘗講學於此宋光宗

紹熙五年甲寅朱文公改建

張南軒墓在長沙府寧鄉縣西一百一十五里

先儒蔡子

宋

蔡沉字仲默福建建寧府建陽縣人西山元定之子也少從朱元晦游元晦晚欲著書傳未及爲遂以屬仲默洪範之數學者久失其傳西山獨心得之然未及論著曰成吾書者沉也仲默受父師之托沉潛反覆者數十年然後成書傳及洪範皇極內篇往往有先儒所未及者宋寧宗慶元三年從西山謫道州跋涉數千里道楚粵窮僻處父子相對常以禮義自怡悅西山沒徒步護喪以還有遺之金而義不可受者輒謝卻之曰吾不忍累先人



也年僅三十屏去舉子業一以聖賢爲師隱居九峰當世名卿物色將薦用之仲默不屑就其文長於論辯詩早慕太白晚入陶韋社中至其吟咏情性摹寫造化則又源流文公感興諸作非徒以詩自命而已李士英曰仲默平居仰觀俯察默坐終晷瞭然有見於天地之心萬物之情反求諸躬衆理具備信前聖之言不予欺也理宗紹定三年卒年六十有四世稱九峰先生

國朝正統元年從祀初謚文正成化三年追封崇安伯嘉靖九年改稱先儒蔡子生子抗博通經史

尤遂於理學理宗紹定初登進士累官諸王宮學教授疏奏權姦不可復用國本不可不早定帝善其言累遷端明學士叅知政事謚文肅

廬峰書院在建陽縣西北九峰下蔡沉建爲師友講學之所宋理宗書扁賜之 本朝正統中重

修

先儒真子

宋

真德秀字景元福建建寧府浦城縣人四歲授書過目成誦十五而孤同郡楊圭見而異之使歸共諸子學遂妻以女宋寧宗慶元五年登進士第授南劍州判官繼試中博學宏詞科召爲太學正嘉定元年遷博士召試學士院改秘書省正字兼檢討玉牒二年遷秘書郎五年遷軍器少監升權直六年遷起居舍人歷知大郡惠政畢舉理宗紹定五年進徽猷閣知泉州迎者塞路深村百歲老人亦扶杖而出城中歡聲動地召爲戶部尚書入見

上迎謂曰卿去國十年每切思賢乃以大學衍義  
進復陳祈天永命之說謂敬者德之聚儀狄之酒  
南威之色盤遊弋射之娛禽獸狗馬之玩有一於  
茲皆足害敬上欣然嘉納改翰林學士知制誥時  
政多所論建踰年知貢舉已得疾拜叅知政事同  
編修勅令經武要畧三乞辭祿上不得已進資政  
殿學士提舉萬壽觀兼侍讀疾亟冠帶起坐乞謝  
事端平二年卒上震悼輟視朝思之不置贈銀青  
光祿大夫謚文忠世稱西山先生德秀之學以朱  
文公爲宗慨然以斯文自任黨禁旣開而正學遂  
明於天下後世多其力也所著西山甲乙稿對越  
甲乙集經筵講義端平廟議獻忠集江東救荒錄  
清源雜志星沙集志文章正宗唐書考疑心經政  
經等書行於世

國朝正統元年從祀成化三年改封浦城伯嘉靖  
九年改稱先儒真子

真德秀祠在湖廣長沙府城中宋寧宗嘉定十五  
年真德秀以寶謨閣待制湖南安撫使知潭州  
有惠政故民立生祠祀之

西山精舍在浦城縣治東真德秀構爲講學之所

中爲講堂後爲拱極堂德秀自爲記  
真德秀墓在浦城縣南孝弟里

先儒許子

元

許衡字仲平河南懷慶府河內縣人父通避亂河南以宋寧宗嘉定元年生仲平於新鄭縣仲平幼有異質七歲入學授章句問曰讀書何爲師曰取科第耳曰如斯而已乎師大竒之聞姚樞以道學自任乃詣蘇門見之樞授以伊川易傳晦菴四書集註或問及小學書仲平讀之默契於中遂手寫而還謂學者曰昔所授受殊孟浪也今始聞進學之序悉取向來簡帙焚之教人無小大皆自小學入篤志力行以身先之旣而移家輝縣蘇門山依

姚樞以便講習元憲宗四年甲寅世祖出王秦中以姚樞爲勸農使教民畊植又思所以化秦人乃召仲平爲京兆提學時仲平年四十六矣秦人新脫於兵欲學無師聞仲平來莫不喜幸郡縣皆建學民大化之中統元年世祖卽位召爲太子太保至元八年累遷集賢大學士兼國子祭酒久之諸生尊師敬業下至童子亦知三綱五常爲生人之道皆能自立爲世用矣史臣謂其設教之方千古一見云至元十八年辛巳卒享年七十有二語其子曰我平生虛名所累竟不能辭官死後慎勿請謚勿立碑但書許某之墓四字使子孫識其處足矣及卒從其治命葬而無碑朝野莫不哀傷焉羅整菴曰衡始終尊信朱子其學行皆平正篤實遭逢世祖使儒者之道不廢可謂有功於斯文矣元成宗大德二年贈司徒謚文正武宗至大二年追封魏國公仁宗皇慶二年詔從祀延祐初詔立魯齋書院於京兆魯仲平居魏時所署齋名也國朝嘉靖九年改稱先儒許子許衡祠在河南開封府新鄭縣學許衡生新鄭縣之陽緩里故爲立祠

魯齋書院在陝西西安府咸寧縣治東北元仁宗  
延祐中建

許衡墓在懷慶府修武縣西北六十里

先儒薛子

本朝

薛瑄字德溫山西平陽府河津縣人年十二能詩  
賦既壯讀周程張朱諸書嘆曰此道學正脉也遂  
焚所作詩賦專心性理之學至忘寢食永樂十八  
年父貞爲河南開封府鄆陵縣教諭命德溫就試  
河南中第一明年辛丑登進士第宣德二年擢御  
史監湖廣銀場正統元年初設提學憲臣出爲僉  
事山東每臨諸生親爲講解不事夏楚皆呼之曰  
薛夫子六年陞大理寺左少卿以獄事註誤退居  
年餘起大理寺丞分守北門禦虜景泰元年督川

聖門志 卷之二  
雲轉餉貴州尋陞南京大理卿四年改北大理寺  
卿天順元年遷禮部右侍郎兼翰林學士入內閣  
尋命主考會試事竣轉左以疾致仕居家八年四  
方從學者日衆每以聖賢爲師惓惓以復性爲教  
嘗曰六經四書性之一字括盡學者讀書窮理須  
實見得然後體而行之不然無異於買積還珠也  
又曰人之子孫富貴貧賤莫不有一定之命世之  
人徃徃於仕宦中昧冒禮法取不義之財欲爲子  
孫計殊不知子孫誠有富貴之命今雖無立錫之  
地以遺之他日之富貴將自至使其無富貴之命

雖積金如山亦將蕩然不能保矣況不義而入者  
又有悖出之禍乎如宋之呂蒙正范文正諸公咸  
以寒微致位將相曷嘗有賴於先世之遺財乎至  
於婦人女子之言尤不可聽余見宦途之人多有  
以是取敗者不可不以爲戒故瑄於出處大節光  
明峻潔於富貴利達泊如也所著有讀書錄續讀  
書錄河汾詩集文集行於世天順八年卒年七十  
有六世稱敬軒先生贈禮部尚書謚文清監丞閻  
禹錫狀其行少保李賢爲神道碑成化元年監丞  
李紳首請公從祀劉文安公繼請公從祀言公直

躬慕古談道淑徒進無附麗退不慕戀勤學好問  
可謂文矣歸潔其身可謂清矣若論其於道所得  
以比朱子諸徒若黃榦輔廣之親承微言金履祥  
許謙之推行緒說未知可伯仲否弘治九年令春  
秋專祀於鄉隆慶五年詔從祀稱先儒薛子  
薛文清祠在山東濟南府城內大明湖之上  
薛瑄墓在河津縣西十里

先儒陳子

本朝

陳獻章字公甫廣東廣州府新會縣人宣德三年  
戊申生於新會之都會村身長八尺目光如星右  
臉有七黑子如北斗狀穎悟絕人讀書一覽輒記  
年二十歲領正統丁卯廣東鄉薦戊辰辛未再上  
禮部不第聞江右吳康齋講伊洛之學往從之游  
遂棄其學而學焉成化二年游太學祭酒邢讓試  
和楊龜山此日不再得詩大驚名動京師五年復  
上禮部不第遂歸隱白沙十七年江西藩臬聘主  
白鹿書院教辭十八年布政使彭韶督府朱英交



聖門志 卷之二  
薦召至京師不就試懇辭乞終養特授翰林院檢討弘治十三年庚申卒年七十有三學者稱爲白沙先生嘗曰吾年二十七始發憤從吳聘君學於古聖賢書無所不講然未知入處比歸白沙杜門不出專求所以用力之方既無師友指引惟日尋書冊至忘寢食如是者累年而卒未得所謂未得者謂吾此心與此理未有湊泊脗合處也於是舍其繁而求之約惟在靜坐久之然後見吾心體隱然呈露始渙然自信曰作聖之功其在茲乎薛侃曰獻章博而能約不離人倫日用而見鳶飛魚躍之機雖無著述其答人論學之書已啟聖賢之扁鑰萬曆十二年從祀稱先儒陳子

先儒胡子

本朝

胡居仁字叔心江西饒州府餘干縣人幼穎異有大志年十七受春秋爲舉子業知無所得稍厭去之聞吳康齋講義禮之學於崇仁里慨然徒步往從之游於是以前古人自期斯道自任以記誦詞章爲不足事專用心於內其學以主忠信爲本以求放心爲要以聖學成始咸終在於敬因以敬名齋處家庭如朝堂對妻孥如賓客端莊凝重履繩蹈矩造次顛沛未嘗少違隱微幽獨之際愈嚴愈密初家食有餘推以與人不償不之較厥後家益窘

甚至簞食瓢飲處之泰然或爲之籌則應之曰以仁義潤身以牙籤潤屋足矣四方樞衣及門者衆於是築室於梅溪山中聚徒講學語學則曰爲己語治則曰王道又曰第一怕見得不真第二怕工夫間斷多有質美者好高入於禪騁詞失於矜不知操存省察爲何事安能造道德之域欲廣聞見嘗適閩歷浙入廬陵從彭蠡而返所至豪傑相迎資其所益頻年與上饒婁一齋永豐羅一峰南昌張東白相與麗會於弋陽之龜峰餘干之應天寺嘗受藩臬二司聘主白鹿書院教又嘗以諸生敦請講學貴溪桐源書院叔心五經皆通尤邃於春秋自孟子沒後獨推尊二程子朱子以爲得其正傳他不與也所著有居業錄敬齋集成化二十二年卒年五十有一楊廉曰本朝以理學爲倡者薛敬軒讀書錄胡敬齋居業錄粹然一出於正萬曆十二年從祀稱先儒胡子

先儒王子

本朝

王守仁字伯安浙江紹興府餘姚縣人父華成化辛丑狀元歷官南京吏部尚書伯安少穎異有逸氣年十七謁婁一齋知聖學宗旨弘治壬子與胡端敏孫忠烈同舉浙江鄉試己未以禮經中會試第二授刑部雲南司主事尋移病歸越卽陽明洞闢書屋毅然有志聖學甲子主考山東得人最盛調兵部武選司正德元年十二月劉瑾亂政首抗疏乞誅瑾縛杖闕下幾死謫貴州龍場驛丞居夷力學學益進提學副使席書聘主貴陽書院四年

聖門志 卷之三  
閏九月陞廬陵知縣五年瑾誅十二月陞南京刑部主事六年調吏部驗封尋陞署員外郎逾月調文選七年陞考功郎中是年冬陞南京太僕少卿九年陞南京鴻臚卿十一年正月陞僉都御史巡撫南贛汀漳等處伯安至置二匣行臺前榜曰求通民情願聞已過十二年七月伯安欲討賊請提督軍務兵部尚書王瓊素奇伯安請上卽與伯安兵符兼巡撫時宸濠變作伯安起兵勤王獲濠獻俘封新建伯兼兵部尚書嘉靖六年征岑猛黨因平八寨卧病乞致仕行至南安卒歸葬橫溪年

五十有一世稱陽明先生伯安天資絕倫讀書過目成誦少喜俠工詞章好仙釋中年體驗聖學悟從天啟遂屹然以斯道爲己任其學問直求諸心而其教人也以致良知爲主平生著述甚富如傳習錄及文錄今盛行於世初訃聞於朝忌者媒詆遂削世襲伯爵隆慶中復之贈侯謚文成萬曆十二年從祀稱先儒王子

陽明先生祠在餘姚縣龍泉山嘉靖十四年建王文成公祠在江西南昌府大忠祠右嘉靖間建萬曆間重修

陽明書院 有三

一在南直池州府化成寺西嘉靖間建鄒守益爲記

一在江西贛州府贛縣濂溪書院後王陽明嘗講道贛城十人因建書院祀焉

一在湖廣辰州府東王守仁謫貴州時嘗講學於此嘉靖間鄒守益羅洪先爲記

### 啟聖公祠

按自唐以來以顏曾思孟配享坐堂上而顏子之父顏無繇曾子之父曾點子思之父孔鯉皆坐廡下其失在於崇子而抑父

國朝弘治元年吏部尚書王恕請立祠廟祀啟聖王以杞國公無繇萊蕪侯點泗水侯鯉邾國公孟孫氏配享永年伯程珦靖公朱松從祀禮官議不合遂已十四年侍郎曾鐸復請如前亦不合已嘉靖九年大學士張璁奏稱子雖齊聖不先父食而三代之學皆所以明人倫也夫孔

子之所以爲教與諸弟子之所以爲學者不過明此而已今乃使子坐於上父坐於下豈禮也哉若以爲此乃論傳道之功則自古及今未有外人倫而言道者縱出於後世之尊崇非諸賢之本意乞下有司於各處廟學別立一祠庶不失以禮尊奉聖賢之意

世宗從張璪議 詔兩京國子監并天下學校各建啟聖公祠中祀叔梁紇題稱啟聖公孔氏之位而以顏無繇曾點孔鯉孟激配程璪朱松蔡元定從祀萬曆二十三年又添入周輔成從祀

### 啟聖公孔氏

叔梁紇嘗爲魯陬邑大夫初娶魯之施氏生九女而無子其妾生孟皮字伯尼有足疾不任祀事於是乃求婚於顏氏顏氏有三女其幼曰徵在顏父問曰陬大夫父祖爲卿士實先聖王之裔今其身長十尺武力絕人吾甚貪之雖年長性嚴不足爲疑三子孰能爲之妻二女莫對徵在進曰從父所制將何問焉父曰卽爾能矣遂以妻之徵在旣往禱於尼山生孔子孔子三歲而叔梁紇卒二十四歲而顏氏卒合葬於防山宋真宗大中祥符元年

追封叔梁紇齊國公顏氏魯國太夫人元文宗至  
順元年加封叔梁紇啟聖王顏氏啟聖王夫人  
國朝嘉靖九年改稱啟聖公孔氏

啟聖公廟在曲阜縣東南六十里尼山書院西北  
啟聖公墓在曲阜縣東二十里叔梁大夫與顏氏  
合葬墓南負防山北臨泗水墓前有齊國公廟  
廊廡重門俱備金明昌甲辰衍聖公孔元措立  
石表其神道溢津高翻書墓之東南三步許伯  
皮墓在焉 本朝永樂間知縣孔希範立石祭  
春用清明冬用十月三日衍聖公主祭

### 先賢顏氏

顏無繇字路少孔子六歲孔子始教於闕里而受  
學焉爲魯卿士娶齊姜氏生復聖顏子唐玄宗開  
元二十七年追封杞伯從祀孔廟宋真宗大中祥  
符三年加封曲阜侯元順帝元統三年加封杞國  
公謚文裕追封姜氏杞國夫人謚端獻

國朝嘉靖九年改稱先賢顏氏遷配啟聖祠

杞國公廟在曲阜縣復聖廟右

杞國公墓在曲阜縣城東二十里防山之陽顏林  
復聖墓西北



先賢曾氏

曾點字子皙少孔子六歲從學於孔子季武子卒大夫往弔點倚其門而歌故孟子曰曾皙孔子之所謂狂者也孔子嘗誘使言志點願偕童冠夫子與之生宗聖曾子唐玄宗開元二十七年追封宿伯從祀孔廟宋真宗大中祥符二年加封萊蕪侯國朝嘉靖九年改稱先賢曾氏遷配啟聖祠

萊蕪侯廟在嘉祥縣宗聖廟西其制正殿五間寢殿三間東西廡各三間以曾元曾華曾申曾西從祀

曾皙墓在兗州府費縣西南八十里南成山史記  
曾子南武城人按南武者漢泰山郡南城卽今  
之費縣也今祀於嘉祥縣誤矣

### 先賢孔氏

孔鯉字伯魚孔子之子也孔子十九歲娶於宋之  
亓官氏二十歲而生鯉是年初仕魯爲委吏適昭  
公以二鯉魚賜孔子榮君之貺故因以名其子孔  
子嘗謂伯魚曰鯉乎吾聞可以與人終日不倦者  
其惟學焉故君子不可以不學其容不可以不飭  
不飭失禮失禮不立夫遠而有光者飭也近而愈  
明者學也早聞過庭之訓旣長魯哀公以幣召稱  
疾不行年五十先孔子卒生述聖子思子宋徽宗  
崇寧元年追封泗水侯度宗咸淳三年從祀先聖

聖門志 卷之二  
國朝嘉靖九年改稱先賢孔氏配享啟聖祠

伯魚墓在曲阜縣孔林先聖墓東少南相去僅數步墓前有碑鐫泗水侯墓孔子商人蓋尚右也

先賢孟孫氏

孟激字公宜娶仇氏生亞聖孟子孟子生三歲而公宜卒母有賢德挾其子以居有三遷之教孟子爲卿於齊道不行有憂色擁楹而嘆孟母見之曰子若有憂色何也對曰軻聞之君子稱身而就位不爲苟得而受賞不貪榮祿今道不用於齊願行而母老是以憂也孟母曰婦人之禮精五飯幕酒漿養舅姑縫衣裳而已故有閨內之修而無境外之志易曰在中饋無攸遂詩曰無非無儀惟酒食是議以言婦人無擅制之義而有三從之道也故

聖門志 卷之二  
年少則從乎父母出嫁則從乎夫夫死則從乎子  
禮也今子成人也而我老矣子行乎子義吾行乎  
吾禮子何憂乎君子謂孟母知婦道元仁宗延祐  
三年追封孟激爲邾國公仇氏爲邾國宣獻夫人  
國朝嘉靖九年改稱先賢孟氏配享啟聖祠  
孟母祠在鄒縣城南子思書院之右相傳卽孟子  
故宅元成宗元貞初縣尹司居敬建名曰斷機  
堂順帝至元三年僉憲楊國賢命有司重修奎  
章閣學士李洞爲記

國朝正統四年知縣房岳重修教授裴侃記天順  
五年縣丞宋融捐俸重修大學士許彬爲記嘉  
靖四十一年知縣章時鸞萬曆十年知縣許守  
恩相繼重修三十七年知縣胡繼先又添配房  
東西各三楹易斷機堂爲孟母祠

孟母廟在兗州府陽穀縣東北四十里世傳孟母  
祈蠶之所

孟母故宅 有二

一在鄒縣馬鞍山之西孟子所生之地也今名  
付村

一在山西太原府榆次縣相傳孟母并人也其

地有三徒鄉

孟父母墓在鄒縣北二十五里馬鞍山之陽元成宗元貞元年縣尹司居敬始修墓樹碑張頌爲記萬曆二十五年知縣王一楨捐俸置地二十畝以守墓自爲記三十七年知縣胡繼先復置神道地六畝

按孟子之父名激字公宜而今之祀典皆曰孟孫氏魯之以孟孫稱者多矣不近汎與改而正之竊有望於秉禮者其母爲仇氏稽諸聞見此姓甚稀今河間府青縣審冊有一甲內戶丁皆仇姓也

先儒程氏

程珦字伯溫宋人其先日喬伯爲周大司馬封於程後遂以爲氏曾祖羽贈太子少師祖希振任尚書虞部員外郎父適皇贈開府儀同三司吏部尚書伯溫四世而上居中山之博野曾祖太宗朝以輔翊功顯賜第於京師居再世祖而下葬河南遂爲河南人仁宗錄舊臣後以伯溫爲黃陂尉久之知龔州徙知磁州又徙漢州累轉大中大夫宋哲宗元祐五年卒年八十五葬伊川文彥博蘇頌等九人表其清節詔賜帛二百官給其葬

國朝嘉靖九年從祀啟聖祠稱先儒程氏  
河東書院在湖廣黃州府治東宋仁宗天聖中程  
珦爲黃陂尉生二子顥頤於官舍理宗寶祐間  
單懷李節來守請建書院祀焉初在郡城中後  
改建於此

先儒朱氏

朱松字喬年朱氏爲婺源著姓以儒名家世有偉  
人喬年登進士第除秘書省正字轉校書郎遷著  
作郎以御史中丞常同薦除度支員外郎史館校  
勘歷司勳吏部郎出知饒州請祠家居嘗師羅豫  
章與李延平爲同門友聞楊龜山所傳河洛之學  
獨得古先聖賢不傳之遺意於是益自刻厲日誦  
大學中庸之書以用力於致知誠意之地自謂卜  
急害道因取古人佩韋之義名其齋以自警文章  
行義爲學者師有文集行於世當疾革時手自爲

書以家事屬少傅劉子羽而訣於籍溪胡憲原仲  
白水劉勉之致中屏山劉子翬彥冲且顧謂子熹  
曰此三人者吾友也其學皆有淵源吾所敬畏吾  
卽死汝徃父事之而唯其言之聽故喬年歿而熹  
卽稟學於三君子之門喬年卒於高宗紹興十三  
年享年四十有七元順宗至正二十一年謚獻靖  
二十二年追封齊國公

國朝嘉靖九年從祀啟聖祠稱先儒朱氏  
朱公墓在崇安縣西塔山後遷縣東南寂歷一山  
妻祝夫人墓在建陽縣崇泰里後山天湖之陽

### 先儒蔡氏

蔡元定字季通蔡子沉之父也生而穎悟八歲能  
詩日記數千言父發博覽群書號牧堂老人以程  
氏語錄邵氏經世張氏正蒙授季通曰此孔孟正  
脉也季通深涵其義既長辯析益精登建陽西山  
絕頂忍饑啖薺讀書聞朱元晦名徃師之元晦扣  
其學大驚曰此吾老友也不當在弟子列遂與對  
榻講論諸經奧義每至夜分四方來學者元晦必  
俾先從季通質正焉太常寺少卿尤袤秘書少監  
楊萬里聯疏薦於朝召之堅以疾辭宋寧宗慶元

聖門志 卷之二  
四年卒葬於西山之足嘉定三年贈迪功郎謚文節學者尊之曰西山先生其平生問學多寓於元晦書集中所著書有大衍詳說律呂新書燕樂原辨皇極經世太玄潛虛指要洪範解八陣圖說元晦爲之序生子二長淵次沉皆躬耕不仕淵有周易訓解沉別有傳

國朝嘉靖九年從祀啟聖祠稱先儒蔡氏

### 先儒周氏

周輔成周子敦頤之父也維周之先自帝嚳生后稷至太王邑於周後遂以爲氏漢興封周後於汝南輔成蓋其後也世家營道莫詳其遷徙所自族衆而業儒祖從遠父智強智強五子長識宋仁宗天聖五年王堯臣榜第二甲及第終汀州上杭縣令次鏗次正皆不仕次輔成次伯高舉進士其年特奏名迪功郎輔成真宗大中祥符八年蔡齊榜六舉以上特奏名賜進士出身終賀州桂嶺令卒葬道州營道縣營樂鄉鍾樂里樓田累贈諫議大



夫先娶唐氏生子礪礪生仲韋唐氏卒侍禁鄭燦其先成都人隨孟氏入朝因留於京師有女先適盧郎中盧卒後爲諫議公繼室是生敦頤

國朝萬曆二十三年禮部覆湖廣撫按郭惟賢等本奉

聖旨是周輔成准從祀啟聖祠稱先儒周氏

改祀於鄉者七人

春秋林放

林放字子丘山東兗州府人唐玄宗開元二十七年追封清河伯從祀宋真宗加封長山侯

國朝嘉靖九年以家語史記俱不載弟子列改祀

春秋蘧瑗

蘧瑗字伯玉河南衛輝府人仕衛爲大夫靈公立嘗與夫人夜坐聞車聲至闕而止過闕復有聲公問夫人曰知此爲誰夫人曰此蘧伯玉也公曰何以知之夫人曰妾聞禮下公門式路馬所以廣敬

也夫忠臣與孝子不爲昭昭信節不爲冥冥情行  
蘧伯玉衛之賢大夫也仁而有智敬於事上此其  
人必不闇昧廢禮是以知之公使人問之果蘧伯  
玉伯玉行年五十而知四十九年之非六十而化  
孔子至衛主於其家稱之曰君子唐玄宗開元二  
十七年追封衛伯從祖宋真宗加封內黃侯  
國朝嘉靖九年以夫子之所嚴事者不當在弟子

列改祀

蘧伯玉墓在北直大名府開州長垣縣南一十五  
里墓傍有祠

東漢鄭玄

鄭玄字康成山東萊州府高密縣人尚書僕射崇  
八世孫也玄少好學習孝經論語兼通三正曆九  
章算術師事京兆第五元元京氏易又從東郡張  
恭祖受周官禮記左氏春秋韓詩古文尚書以山  
東無足問者乃西入關因涿郡盧植事扶風馬融  
融門徒四百餘人升堂進者一十餘生玄在門下  
三年不得見乃使高業弟子傳授於玄會融集諸  
生考論圖緯聞玄善算乃召見於樓上嘗算渾天  
不合諸弟子莫能解或言玄能者融召玄令算一

聖門志 卷之二  
轉便決衆咸駭服玄因從融質諸疑義及玄業成  
辭歸融喟然謂門人曰鄭生今去吾道東矣玄既  
歸家貧客耕東萊學徒相隨已數百千人獻帝在  
許都徵爲大司農玄不得已載病從至元城卒年  
七十四歸葬礪阜山所註禮記六十三卷周禮四  
十二卷儀禮十七卷唐太宗貞觀二十一年從祀  
宋真宗追封高密伯嘉靖九年以學未顯著改祀  
鄭玄書院在萊州府即墨縣東南二十五里  
鄭玄墓在高密縣西北五里唐太宗貞觀中嘗  
禁樵採

### 東漢鄭衆

鄭衆字仲師河南開封府人有功諸經聞杜子春  
能讀周禮往受業焉自爲周官傳唐太宗貞觀二  
十一年從祀宋真宗追封中牟伯  
國朝嘉靖九年以學未顯著改祀

### 東漢盧植

盧植字子幹北直順天府涿州人受學於馬融有  
功諸經唐太宗貞觀二十一年從祀宋真宗追封  
良鄉伯

國朝嘉靖九年以學未顯著改祀

東漢服虔

服虔字子慎河南開封府滎陽縣人註春秋左氏傳前漢書及著辭賦碑誄書記連珠九憤凡十餘篇唐太宗貞觀二十一年從祀宋真宗封滎陽伯國朝嘉靖九年以學未顯著改祀

晉范甯

范甯字武子河南開封府鄆陵縣人註春秋穀梁傳唐太宗貞觀二十一年從祀宋真宗追封新野伯國朝嘉靖九年以學未顯著改祀

罷祀者十五人

春秋公伯寮

公伯寮字子周山東兗州府人唐玄宗開元二十七年追封任伯從祀宋真宗加封壽張侯

春秋秦冉

國朝嘉靖九年以愬子路沮孔子罷祀

秦冉字開河南汝寧府人唐玄宗開元二十七年追封彭衙伯從祀宋真宗加封新息侯

國朝嘉靖九年以家語不載疑史記誤書罷祀  
春秋顏何

顏何字冉山東兗州府人唐玄宗開元二十七年  
追封開陽伯從祀宋真宗加封堂邑侯

國朝嘉靖九年以家語不載疑史記誤書罷祀

周末荀况

荀况字卿趙人楚蘭陵令作荀子三十篇宋神宗  
元豐七年從祀追封蘭陵伯

國朝嘉靖九年以言性惡罷祀

漢楊雄

楊雄字子雲四川成都人作法言宋神宗元豐七  
年從祀追封成都伯

國朝洪武二十九年以事王莽罷祀

漢戴聖

戴聖字次君梁人傳小戴禮唐太宗貞觀二十一  
年從祀宋真宗追封楚丘伯徽宗改封考成伯

國朝嘉靖九年以賊吏罷祀

漢劉向

劉向字子政漢之宗室作說苑新序唐太宗貞觀  
二十一年從祀宋真宗追封彭城伯

國朝嘉靖九年以誦神仙方術罷祀

東漢賈逵

賈逵字景伯扶風平陵人受周禮於杜子春有禮  
解行於世又著經傳義詁及論難唐太宗貞觀二  
十一年從祀宋真宗加封岐陽伯  
國朝嘉靖九年以會附圖識罷祀

東漢馬融

馬融字季長扶風茂陵人註詩易三禮尚書若干  
卷唐太宗貞觀二十一年從祀宋真宗追封扶風  
伯

國朝嘉靖九年以黨附勢家罷祀

東漢何休

何休字邵公任城樊人註春秋公羊傳唐太宗貞  
觀二十一年從祀宋真宗追封任城伯

國朝嘉靖九年以註風角等書罷祀

魏王肅

王肅字子雍東海郟人肅善賈馬之學而不好鄭  
氏采會同異爲尚書詩論語三禮左氏解及撰定  
父朗所作易傳皆列於學官唐太宗貞觀二十一  
年從祀宋真宗贈司空

國朝嘉靖九年以爲司馬師畫策篡位罷祀

魏王弼

王弼字輔嗣山陽人注周易九卷唐太宗貞觀二十一年從祀宋真宗追封偃師伯國朝嘉靖九年以宗旨老莊罷祀

晉杜預

杜預字元凱京兆杜陵人註春秋左氏傳時號杜武庫唐太宗貞觀二十一年從祀宋真宗贈司徒國朝嘉靖九年以建短喪罷祀

宋王安石

王安石字介甫江西撫州府臨川縣人徽宗崇寧三年配享孔子廟庭政和三年追封安石舒王及子雱臨川伯從祀欽宗靖康元年以其學術之謬蠹國害民罷安石配享降居從祀之列孝宗淳熙四年去雱畫像理宗淳祐四年黜安石從祀

元吳澂

吳澂字幼清江西撫州府崇仁縣人羽翼聖經著述甚多有孝經章句易春秋禮記纂言學基學統等集行於世

國朝正統八年追封臨川郡公從祀嘉靖九年以忘宋事元罷祀

擬祀者三十五人

孔門二人 宋十七

漢一元二

唐一 明十二

孔門二人

懸亶

餘冬序錄曰懸豐今家語作懸亶禮記檀弓篇

懸子疑卽其人而祀典今不及焉宜補贈懸亶

爵號列諸從祀按家語有懸亶而無鄔單史記

有鄔單而無懸亶疑卽一人以姓名相近而誤

耳且其字家語日子象史記日子家象字類家

字疑亦誤書今當祀懸亶而罷鄔單似爲近之

蓋與其從史記不若從



顏何

顏子世家云顏氏

魯國卿大夫魯國之族

最爲蕃衍孔門達者七十二人顏居其八顏無繇顏回顏辛顏高顏祖顏之僕顏何顏噲及考顏氏裔孫顏之推所著家訓亦稱仲尼門徒升堂者七十有二顏氏居八又顏子四十代孫顏真卿序家譜云孔門達者顏氏有八名同世家國朝嘉靖九年張璁引程敏政之議曰秦冉顏何不載於家語而史記載之疑亦爲字畫相近之誤遂奏罷其祀今冉雖別無可考以索隱世家

之推真卿說考之則何爲子淵之族其不當罷祀也明矣以未定之說黜已祀之賢舉而祀之尚有望於將來

漢儒

一人

鄭玄

傳經功大後鮮其儔且稱懿行君子昔祀於廟今改於鄉宜復其祀

唐儒

一人

孔穎達

見 皇明王禕奏疏

聖門志 卷之二  
宋儒 十七人

范仲淹

見 王禕奏疏

魏子翁

見 王禕奏疏

李侗

丘瓊山曰在宋言者屢以歐陽修蘇軾孫復胡瑗爲請而近日亦徃徃有以楊時羅從彥李侗爲言事下儒臣議議者皆不之從以其無功於經也見大學衍義補按侗元順帝至正間已從

祀見疏議輯畧程敏政疏成化元年命福建延平府立祠祀宋儒楊時以羅從彥李侗配享見憲章錄萬曆十二年少詹事沈一貫疏中惜游酢呂大臨謝良佐羅從彥李侗相宏六人不能盡祀見從祀疏議錄

羅從彥

見衍義補憲章錄

何基

成化三年浙江按察司僉事辛訪奏要將金華府宋儒何基王柏元儒金履祥許謙封爵從祀

該翰林院議得止可昭  
郡山楊時事例立祠鄉  
郡春秋祭祀見憲章

王柏

見憲章錄

金履祥

見憲章錄

黃榦

見薛瑄傳

輔廣

見薛瑄傳

蘇軾

見衍義補

孫復

見衍義補

文天祥

嘉靖元年四川叅政許讚奏曰臣聞之或人曰  
文天祥岳飛皆可從祀孔子而馬融楊雄皆在  
可斥正以重綱常倫理之實而輕言語文字之  
習也見薛文清行實錄

岳飛

見薛文清行實錄

游酢

隆慶中工部侍郎等居破特疏請從祀萬曆十二年沈一貫疏中首惜酢不能盡祀

呂大臨

見崇祀錄

謝良佐

見崇祀錄

胡宏

見崇祀錄

元儒二人

劉因

成化元年助教某言元儒劉因許謙宜祀見憲章錄弘治元年禮部尚書周洪道等議薛瑄與元儒劉因並欲從祀以人謂其無所著述止見今言

許謙

兩見憲章錄

明儒十二人

蔡清

萬曆元年祀於鄉十二年御史黃師顏祭酒張位洗馬陳于陞少詹事王士性萬象春十六年僉都御史詹仰庇俱請從祀孔廟見崇祀錄及奏疏

陳真晟

萬曆元年祀於鄉十二年御史黃師顏少詹事沈一貫給事中王士性田大年俱請從祀孔廟見崇祀錄

羅倫

萬曆十二年御史黃師顏給事中田大年王士性少詹事沈一貫光祿寺丞李楨俱請從祀孔廟見崇祀錄并疏

章懋

萬曆元年祀於鄉十二年侍中周子義左都御史趙錦少詹事沈一貫給事中田大年王士性御史黃師顏二十五年御史屠一鵬俱請從祀孔廟見崇祀錄并疏

黃仲昭

見崇祀錄沈一貫黃師顏疏

吳與弼

見崇祀錄沈一貫田大年及御史許子良疏  
鄒守益

見崇祀錄沈一貫趙錦田大年疏

王良

見崇祀錄張位沈一貫田大年王士性疏

羅欽順

見崇祀錄張位趙錦李楨及員外郎蕭景訓疏

羅洪先

見崇祀錄張位蕭景訓及侍郎舒化疏

呂楠

見崇祀錄周子義趙錦李楨王士性疏

曹端

見崇祀錄李楨疏

擬孟廟配享從祀者四人

配享一人

韓愈

按孟子之世後於閔冉而孔廟配享之位上於  
閔冉者功大故也程朱表卑孟氏之功偉於趙  
岐孫奭而不敢議祀於孟初者德盛故也韓退  
之之功之德使在孟門當為具體章丑所不敢

望也且又與孟子同祀不廟矣而復列於廡下  
屈在盆成之後孟子之手弗安也今既已祀之  
理不忍廢苟援孟子配食尼父之禮升之堂上  
東向以處與樂正配庶以明兩慊焉

從祀 三人

趙岐

昔秦漢之間孟子卑卑諸子間耳自漢趙太常  
岐出而始擬其人於宣尼齊其書於論語尊以  
亞聖創爲傳註至其生平制行孝能錫類忠足  
衛君陷夷不辱履危弗貳剛直義烈方之巖巖

氣象誠無愧焉

孫奭

五季之亂儒學掃地昌黎之文未行濂洛之道  
未開宋孫宣公奭獨爲信好叅考群說彙成正  
義雖舛誤不無一二實與他註之漫無發明及  
隨聲附和者萬不侔矣且又方重自持質直事  
上明於禮制嫻於經術若夫諫天書止西祀侍  
講仁宗反覆規諷真所謂非堯舜不陳者校之  
推尊孟氏而諛言以佞新斥賢以禍宋者人品  
懸絕焉

錢唐

按唐居常以豪杰自矜因元亂遂隱而不仕年近六十謁

太祖賦長詩一章稱旨拜刑部尚書洪武二年詔去孟子配享有諫者以不敬論且命金吾射之錢唐不難捐軀以諫此其爲志又豈禍福生死所能亂哉

太祖覽其情詞剴切遂復孟子祭則其書之得列於學官子孫世受其封爵皆唐之力也崇而祀之以報其功不亦合於公論而有光於孟氏與

按自古弟子之盛孔子之外無踰孟子歷代之崇報及於弟子者亦惟二氏而諸賢無聞焉議孔廟之祀者不下數十家而孟廟之祀寥寥自

世宗釐正祀典孔門弟子及諸從祀者並罷封爵止稱先賢先儒國學郡邑皆然而孟子諸弟尚仍舊封其師已易上公之號而其徒乃襲侯伯之名非所以安神靈一王制也宜以孔廟近例改之爲當竊有望於秉禮者





